

# L'ANIVERSARI


di GIUSEPPE MARIUZ

A i 12 di Zenâr dal 1947, juste setante agns indaûr, al nassee il Movimento popolare friulano per l'autonomia regionale (Mpf). Lu veve metût sù un grop di zovins inteletuâi che al sburtave pal ricognossiment di une Region Furlane che e cjapàs drentri dut il teritori de provincie di Udin (cu la Diestre Tili-ment che i faseve part), chel che al restave de vecje provincie di Gurize e il Mandament di Puart. Compit dal Moviment al jere chel di unî, parsore dai partîts politics, dutis lis fuarcis, fin a chel moment sparicadîs, che a viodevin te autonomie regionâl la uniche garanzie par lis libertâts democrâtichis.

Il prin a tirâ fûr la cuistion de autonomie, come che si sa, al jere stât, subit dopo la Liberazione, Tiziano Tessitori, elet an- ce a la Assemblee Costituente tes filis de Democrazie cristiane. I firmataris dal Moviment a volevin puartâ il discors no dome jenfri lis stanziis de politiche, ma ançe framieç la int. O ricuardin che a jerin Gianfranco D'Aronco (nomenât segretari gjenerâl), Luigi Ciceri, Chino Ermacora, Alessandro Vigevani di Udin, Pier Paolo Pasolini e Zefferino Tomé di Cjasarse, Luigi Pettarin di Gurize e Attilio Venudo di Puart.

Il moment al jere just, stant che ai 18 di Dicembar dal 1946 la seconde Sot-comission dai "75" de Costituente e veve discutût su la suddivision in Regions, aprovant la "Regione Friulana" che e varès tignût drentri - cussì si veve votât - il teritori dal Friûl plui lis tieris de Vignesie Julie che cul Tratât di Pâs a saressin restadis tal Stât talian, cun escluson dal Distret di Puart. Triest e jere pal moment fûr dal discors, par vie dal providût Teritori Libar. In chê volte i partîts no jerin ducj dacuardi (massime il Partît comunista) e nancje i Comuns che a varessin vût di dâ un parê. Di fat, te part occidental dal Friûl diviers Comuns, scomençant di Pordenon, a volevin stâ cu la "Regione Veneto" ma ançe a Gurize nol mancjave il suspjet di vignî supâts de fuarce di Udin.

Il Moviment al rivà a movi lis agnis fin dal prin comizi al Cine Puccini, ai 19 di Zenâr. In



Il pari dal autonomisim, Tiziano Tessitori, elet ançe a la Assemblee Costituente

## Il sium de autonomie dal Moviment populâr furlan

Tal Zenâr dal 1947 un grop di zovins inteletuâi si jere metût adun par riunî dutis lis fuarcis che a viodevin te Region une garanzie pes libertâts democrâtichis

Fevrâr al jere bielzà jessût il librut *La Regione friulana* e tal zîr di pôc timp nons lustrissims a vevin dât l'adesion: oltri a Tessitori, il poete Biagio Marin, il storic Pier Silverio Leicht, bons. Ivan Trinko da lis Valadis dal Nadison (o Benecjia) e il president de Cjamare di Cumierç Gaetano Pietra. Intant, si jerin formadis fintremai 53 Sezions teritoriâls, de zone di Pordenon a Gurize, di Sapade a la Basse, de Val Cjanâl ai migrants tal forest.

Tal Moviment populâr furlan si cjatavin variis animis dal front autonomist. Al è interesant viodi che lis motivazions par la autonomie a jerin sore- dut culturâls e economicis, mancul di caratar lenghistic. Dut câs, La Patrie dal Friûl di pre Josef Marchet e ospitave

**FONDADÔRS E PROTAGONISCI**  
Cun Tessitori D'Aronco, Ciceri Ermacora e Pasolini ançe Biagio Marin Pier Silverio Leicht e Ivan Trinko

un alegât in marilenghe dal Moviment.

Lis robis si imberdearin dopo che i comunicj a cambi- arin parê, poiant une Region a statût speciâl, stant che le consideravin un teritori "mistilingue" par la presince dai slovens. Il front si crevâ par pôre dal bilenghisim e des rivendicazions de Jugoslavia. Il

Mpf, cussì come la Filologjiche, a puartarin indenant la linie che l'impuartant al jere di difindi l'autonomie intune Region Furlane, nol impuarta- ve se ordenarie o speciâl.

Dopo che l'Assemblee Costituente tal Jugn dal 1947 e veve votât a pro de Region Friul-Vignesie Julie a statût speciâl, lis polemichis a continuarin par mès. A vignivin atacâts no dome i partîts di çampe e la mino- rance slovene, ma ançe il Mpf e il stes Tessitori; in manciance di un acuardi, in Otubar la atuazion de Region e fo rinviade cuntune "Norma transitoria". Il fat al lassà il marum in bocje ai autonomiscj. Patrie dal Friûl e protestave cuintri i furlans che no savevin fâsi valê a Rome e il Moviment populâr furlan al tentave un ricors cuin-

tri la decision dal rinviament, ma cence sucès.

Intant, i tims a mudavin e la "Vuere frede" e cjapave drentri fuarcis politichis e culturâls. Pasolini tal Fevrâr dal 1948 si gjavave par lis "involuzions" dal Moviment, che par altri nol veve une linie precise, pûr se dongje dai candidâts auton- omiscj di aree democristiane e centriste. Ma ançe i democri- stians si tirarin vie cuant che il Mpf al decidè, dal 1949, di participâ diretamentri a lis ele- zions. Si vierzè une crisi cun di- missions di masse, tant che cuant che il Moviment si pre- sentà a lis elezions amministrativis dal 1951 al cjapà dome un conseir in Provincie e nissun tal Comun di Udin. Tal 1953 il Moviment al scomparì.

© RIPRODUZIONE RISERVATA

### COROT

Marum pe pierdite di cuatri personaçs che a àn dât tant pe marilenghe



Tullio De Mauro

UDIN

I prins dîs di Zenâr dal an gnûf nus àn riservât il marum de pierdite di cuatri personaçs che, in diferents tims e situa- zions, a àn contribuît a fâ cres- si la cussience dai dirits dal Friûl e de sô lenghe.

Tullio De Mauro, il linguist forsît plui cognossût e preseât in Italie, che al è stât ançe mi- nistri de publiche istruzion, al jere vignût plui voltis in Friûl, a partî dai agns Setante dal Nûfcent cun Mario Lizzero, par sostignî lis resons di une des primis propuestis di leç pes minorancis linguisticis.

Al jere tornât a Udin in agns resints par presentâ il Grant di- zionari bilengâl talian - furlan e dâ conseis sul disvilup de marilenghe e sui imprescj che a coventin al di di vuê. Inte sô lungje vite professionâl di doc- cent universitari e di scritôr, ta- cade tal 1963 cul saç *Storia lin- guistica dell'Italia unita*, si jere simpri batût par slargjâ e di- fondi la cognossince linguisti- che dal talian a nivel populâr e, tal stes timp, par mantignî vîfs i dialets e lis lenghis di mino- rance, che a insiorin la culture di un País biel e complès come l'Italie.

Cualchi di dopo di lui, o vin savût cun displasê che al jere mancjât il professôr Marzio Strassoldo. Come retôr de Uni- versitàt di Udin dal 1992 al 2001 al jere stât un pionîr de gnove riforme e un grant inov- adôr, come che al à ricuardât il sindic Furio Honsell, deven- tât retôr dopo di lui.

Come president de Provin- cie di Udin dal 2001 al 2007, e dopo di chê esperience come fondadôr de associazion politi- che "Identità e Innovazione", Strassoldo al veve sburtât par une autonomie dal Friûl dal pont di viste amministratîf, cul- turâl e economic.

Al jere inmò conseir de So- cietàt Filologjiche Furlane e president de Societàt Scientifi- che e Tecnologjiche Furlane.

Nus à lassâts a 57 agns in- ce Alberto di Caporiacco, che dal pari Gino al veve supât l'amôr pe storie e culture de sô tiere e sore- dut pe sô autonomie.

Al jere stât preseât come as- sessor ae culture al Comun di Udin e par bataiis politichis là che no si sparagnave, ançe a cost di polemichis e scuintris judiziaris. Par ultin, o vin pier- dût pre Meni Zannier.

Di lui o fevelarin plui a larc su la prossime pagine Marilenghe. (r.f.)

© RIPRODUZIONE RISERVATA

### ART DAL NÛFCENT

## Italico Brass, partide di briscule



■ Italico Brass (Gurize 1870 - Vignesie 1943) al fo plui voltis pres- int a la Bienâl e al tignî mostris tes grandis citâts di Europe. Ta chest cuadrî nus puarte dongje la atmosfere di une partide di briscule. E noaltris si domandìn: sono ancjimmò ostariis ta chest mont? (g.e.)

### TRADIZIONS

## Lis Calendis e i segns di San Pauli

di Mario Martinis

La magjie principâl dal mès di Zenâr, cence dubi, e jere tes Calendis (o mesâis), tradi- zion sapienzial di caratar me- teorologjic difondude in buine part de Italie setentrionâl e une vore inludrisade in Friûl. Jenfri lis diviersis crodincis e lis praticis populârs divina- toriis, ançe in Friûl a jerin des usancis che a vevin a ce fâ cu lis previsionis dal timp, ven a stâi i mudaments atmosferics tes cuatri stagjons dal an, ce- tant utilis di cognossi par sta- bilî i moments plui juscj pes seminis, cerpiduris, racuelts, incalms, trasformazions e conservazion dai prodots e in generâl par dutis lis voris

agrariis. Il pronostic principâl sul timp al stave juste apont tes Calendis che, se ben fat, nol podeve falâ.

La prevision des Calendis si formave tai prins 24 dîs di Ze- nâr. Ai prins dodis dîs a cori- spuindevin i corispêtifs mès dal an (di Zenâr a Dicembar), biel che pai 12 dîs dopo i mès corispêtifs a jerin contâts par ledrôs. Cussì il 13 di Zenâr al corispundeve a Dicembar, il 14 a Novembar e vie inde- vant, fin al 24 che al cori- spuindeve di gnûf a Zenâr.

Di chest dopli cont conti- nuât e ven fûr la detule "lis ca- lendis prime a van indevant e po indaûr". Secont la tradi- zion, se il timp tai doi dîs che a corispundin a un ciert mès

in dutis dôs lis schiriis (par esempli il 3 e il 22 di Zenâr che a corispundin al mès di Març) al jere compagn biel o ploiôs, si pronosticave che tal mès indicât il timp al sarès stât ancjetant biel o ploiôs, biel che se i dâts a jerin in con- trast il timp al sarès stât varia- bil.

Par ultin, la prevision e vi- gnive confermada o dineade dai "segns" di San Pauli, ven a stâi dal timp dai 25 di Zenâr, fieste de Conversion dal apue- stul.

Se la albe di chê zornade e jere serene, la prevision e sa- rès stade confermada, se inve- zit e jere scure di nûi o s'al ploveve, e vignive ribaltade.

© RIPRODUZIONE RISERVATA